



LABANK SANTRAL SESEL

Bwat Postal 701, Viktorya, Sesel

Tel: + (248) 4 282 000; Fax: + (248) 4 226 104

Sitweb: www.cbs.sc

KOMINIKE LAPRES

Viktorya – le 21 Septanm, 2018

Labank Santral i aprouve pour Labank Habib ferm son brans Sesel

Labank Santral Sesel in aprouv demann fer par Labank Habib pou ferm son biznes Sesel.

Labank Santral ti resevwar sa demann Lendi le 10 Septanm 2018, e sa in ganny aprouve par Bord Labank Santral, Zedi le 20 Septanm 2018, an linny avek '**Schedule 5’ Lalwa ki gouvern bann lenstitisyon finansyel** (Financial Institutions Act, 2004).

Labank Habib in fini ganny enformen lo sa desizyon e i aprezan bezwen pibliy en notis dan Gazet Ofisyel e osi dan en zurnal lokal pou anonse ki i pe ferm son biznes Sesel. En kopi sa notis i osi bezwen ganny soumet avek Biro Lanrezistreman.

Menm si Labank Habib pa pou pe aksepte okenn novo biznes aparti ozordi, Vandredi le 21 Septanm 2018, swivan laprouvasyon Labank Santral pou li fermen, i annan en prosesis kler ki sa labank i bezwen swiv konman parti demars pou aret son loperasyon. Sa i enkli repey tou bann kliyan ki annan larzan dan kont avek sa labank e osi repeyman son bann det, an relasyon avek son bann loperasyon isi Sesel. Kliyan Labank Habib i annan ase letan, ziska le 28 Desanm, 2018, pou fer bann formalite neseser.

Konman sa lenstitisyon ki siperviz sistenm banker Sesel, Labank Santral i oule met lanfaz lo lefe ki i pe travay tre pros avek Labank Habib pou asire ki lentere kliyan sa labank i ganny prezerve. Labank Santral i osi oule reasir bann kliyan e piblik an zeneral ki Labank Habib i annan ase larzan e lezot byen pou garanti ki tou dimoun ki annan kont avek li e okenn dimoun ki sa Labank i dwa, pou ganny rann tou zot larzan.

Kliyan Labank Habib pe ganny ankouraze pou servi bann facilite transfer elektronik, pou bouz zot larzan dan kont ki zot annan avek bann lezot labank komersyal. Pou fasilit sa prosesis, Labank Habib pa pou sarz okenn fre asosye avek transfer larzan ek lezot tranzaskyon relye avek zot kont, e osi fermtir kont. Kliyan ki anvi larzan likid pour kapab retir ziska 50 mil roupi.

Pou bann ki bezwen ouver en novo kont avek lezot labank komersyal, Labank Santral in deza annan diskisyon avek bann labank pour fasilit sa prosesis; toudmenm sa bann labank pou bezwen aplik zot bann prosedir pour ganny lenformasyon ki neseser pou ouver kont.

Manm piblik pe osi ganny konseye pou aret fer peyman ouswa aksepte tyek relye avek okenn kont Labank Habib, apre vandredi le 21 Septanm. Sepandan, Labank Santral ek bann Labank komersyal pou kontinyen akspete tyek valid ziska le 31 Oktob, 2018.

Dan ka bann peyman tyek kin deza ganny fer, me sa kliyan in fini ferm son kont avek Labank Habib, lede parti konsernen pour bezwen fer novo laranzman. Laranzman alternativ pour osi bezwen ganny fer pou bann peyman planifye, tel ki ‘standing order’.

An sa ki konsern ‘loan’ ek lezot fasilité kredi, kliyan pou ganny enformen lo laranzman ki Labank Habib pe fer, ouswa bann differan opsyon ki egziste pour zot fini repey zot det.

Dan zefor pou asiste kliyan ki annan okenn konsern, konplent ou klarifikasyon, an relasyon avek fermtir Labank Habib, Labank Santral in etablir en ‘hotline’ kot zot kapab telefond nimo 2510025, aparti sa Vandredi. Labank Habib in osi fer laranzman neseser pour asire ki okenn konsern son bann kliyan i ganny adrese.

Parey i ganny spesifye dan seksyon 4 anba ‘Schedule 5’ lalwa ki gouvern bann lenstitisyon finansyel, Msye Huns Biltoo, en partener KPMG Moris, in ganny apwente konman sa azan ki pou siperviz prosesis ki Labank Habib i bezwen swiv pour ferm son biznes.

Labank Santral pe anvizaze ki tou sa bann prosesis i ganny fer dan en dele letan rezonnab, anvi ki in etablir lafen Fevriye 2019, konman dat final kot laysens Labank Habib pou ganny kennsel, pou li ofisyelman termin son loperasyon Sesel.

Labank Habib i annan 12 anplwaye, parmi 10 Seselwa. Labank Santral in demann sa lenstitisyon pou enform son bann travayer lo sa bann devlopman e pour asire ki zot ganny trete byen e resevwar konpansasyon ki spesifye dan lalwa lanplwa Sesel, an konsiltasyon avek Minister responsab pour lanplwa.

Anvi devlopman e novo loportinite ki egziste dan sekter finansyel, Labank Santral i annan konfyans ki zot pou ganny loportinite travay, e i pou rankontre bann travayer pou donn zot serten gidans lo sa bann posibilite lanplwa. Gouverner Labank Santral, Manmzel Caroline Abel, in deza annan en premye rankont avek bann travayer sa labank Zedi apremidi.

Labank Habib ki baze Karachi, Pakistan, ti ouver en brans Sesel an 1976. Bann responsab sa labank in dir ki desizyon pour ferm zot biznes Sesel i baze lo reorganizasyon stratezik ki sa labank pe fer.

An linny avek son langazman pou asir latransparans, Labank Santral pou asire ki kliyan Labank Habib e manm piblik an zeneral, i reste azour avek bann devlopman konsernan fermtir Labank Habib.